



麗水縣志

ル 5  
3140  
6



門 5  
號 3140  
卷 6

麗水縣志卷十一



麗水縣知縣黃平彭潤章重修

人物二

明

金愷字舜臣宣德四年舉人授霑化訓導陞監察御史歷江西廣東雲南按察司僉事所至著能聲三子文忠信文字尚德景泰三年進士選翰林庶吉士出守開封權豪懾其威重奉敕理南畿獄誣者得雪以沈香木刻像祠之上便民十事詔布天下為定式著有好事錄履素閒吟讞獄餘興和唐百

麗水縣志

卷之十一 人物

十一

絕東游稿忠天順八年進士授監察御史值星變  
疏陳三事權貴怒中傷之謫戍遼東怡然就道著  
有甕天稿東甌童子吟信成化十六年舉人忠子  
奇字崇厚上疏請代忠戍不許忠死徒步扶柩以  
歸成化二十年成進士授合州知州有殺一家六  
人者獄七年不決奇承檄往鞫之夜夢老嫗拜橋  
下旦而迹之獲刀於水以示逞兇者乃大驚服官  
終衡州知府著有避名稿茅齋集信子旅祺旅字  
崇吉以貢授永昌府判興利剔蠹民歌其績承檄  
撫隴川夷酋長饋白金良馬拒不受謝事歸吟詠

自適年八十八乃卒著有易意白湖詩文集祺字  
崇郊工詩善書以舉人授亳州知州寇盜斂迹擢  
河間府同知轉南京左軍都督府經歷卒於官所  
有惟圖書而已初愷祖善洪武初由人才爲行軍  
掾史活人甚衆終乾州知州其後世多賢明咸謂  
善隱德所致云

王模字良範弱冠領鄉薦授淮安府推官刑清民服  
撫院奇其才委監察諸郡縣官吏無少阿縱尋陞  
鎮江通判不赴歸篋蕭然隱居東郊以老

許盛其先合肥人洪武中由雲南武德衛調處州衛

世襲百戶正統中從征閩寇有功景泰間剿浮雲鄉賊王敬參以斬獲多陞授副千戶復與討宣平賊祝岳二平之居常角巾野服與文士優游琴酒唱和成卷時有繪竹溪六逸圖以紀之者天順中卒

李海先世順義人以在京義勇衛調處州衛世襲百戶景泰中征宣慈鄉山賊敗之生禽二人進勦遂昌陣亡

吳泰處州衛人父早逝母王氏撫之年十一襲千戶職雅志文藝禮度雍容正統間山寇竊發城守有

功未四十乞休自號懶雲以見志云

傅廣先世濮州人由興武衛調處州衛世襲百戶備倭蒲岐有功正統中勦山賊陳鑑胡於周坦敗之旋沒於陣

葉元愷字舜舉正統中以舉人授沂水知縣有豪民橫於里中又習法令善持官長短長號十龍九虎元愷至窮竟其罪境內安枕後卒於官民建遺愛祠祀之

案府志誤作華元愷從山東通志正

葉鉅字伯廣正統間鑛盜陳鑑胡葉宗留等通福建賊鄧茂七流剽數省官兵禦之輒失利勢張甚監

守銀冶御史李俊以聞卽詔俊勦捕十三年冬十二月鑑胡寇遂昌俊命鉅往援之戰於街亭橋斬其酋齊炆鑑胡遁去而別賊陶得二等於明年正月掩官兵不備突出破橋分守參議耿定等戰死遂長驅攻郡城會鉅自遂昌還越重險踰南明門入率豪健五百餘人出通惠門敗賊於後溪賊潰去五月劉五陳三等復聚衆奇山肆劫掠指揮沈麟與戰敗死鉅率鄉兵進勦戰於後坑淤擒劉五斬陳三追至新嶺而還比鑑胡平鉅以功授巡簡辭不受乞移贈故父孟昭詔許之先是歲饑鉅出

粟四千斛振之以義行旌至是復旌其門曰忠孝

所著有樂叩集

案明史孝義傳序作葉伯廣蓋當時書其字以旌也

項孔昌性介直不事邊幅因自號直齋年四十始領鄉薦授南安訓導以憂歸起復改通判分校南闈以公正稱遷福安教諭歸里優游泉石以詩酒會其耆彥時修治橋道以利人云

徐松字允貞受業於應鹿鳴應故得金氏履祥之傳者也明初累以明經薦堅不起著有諸經證辨皇極理數源流括蒼風物紀景泰中卒

吳洪字尹廣生而敦朴讀書行義不干名譽父爲上

杭稅官邁危疾藥不效洪割股肉雜淖糜以進遂愈幼弟以父命後於母族葉氏既老而貧且無子洪迎歸室廬服用咸與已均壹童孫拾銀釵於道洪密訪其主還之守令重其行歲時鄉飲率禮爲賓天順二年無疾而終

紀深字叔淵正統中山賊陳鑑胡陶得二等爲亂圍郡城深率其子六人與戰於南明門斬渠魁十餘賊奪氣遂潰去

葉玉字振之八歲充增廣生孝事二親至老不懈與弟同居友愛甚篤以貢授福州校官捐俸以助貧

生後遷潯州教授歸歷官二十四載清苦如諸生焉

葉曾字一之髻鬣有穎異聲父病祈神請代葬母啟穴有紫茜人以爲異遊吳下名藉甚司訓宣城以薦擢順義令再擢莒州守致仕歸觴詠自適著梅下餘言八卷歿祀鄉賢

高鑑字益之力學敦行不樂仕進鄉里有爭訟得一言卽解性謙謹遇童穉必以禮咸以篤行推之

項泖字德容年二十七始志於學質魯恒執書跪讀遂通其奧以貢授德興訓導經指授者俱底於成

卒年八十七

戴銓字文衡處州衛人以歲貢授鹽城訓導值歲歉當道命監賑至興化得羨銀九百餘兩令請中分之銓悉以分賑令復以金贖懼其泄前語也銓堅却之淮陽賊嘯聚承檄入賊巢曉以禍福賊遂解散轉益都教諭擢宿遷知縣未赴卒鹽城人祀諸名宦所著有會正錄十二卷

裘仁字天爵處州衛人中宏治二年鄉試居常授徒言笑不苟諸生侍立無敢傾側栝郡名士多出其門事親恭順或逢母怒卽夫婦跪請俟怒釋乃起

後官北京都察院都事正直不阿權貴致政家居足不履公庭焉

鄭宣字士達宏治六年進士由行人選御史風裁峻整以抗禮逆瑾謫興化推官多善政莆人祀之尋陞江西僉事禦寇有功進參議乞歸著有宋元綱目愚管郡志補遺古栝遺芳諸書

張欽字克讓性質直能面斥人過友愛諸弟不計生產時與汪瑛吳榮會講經義以貢授九江訓導擢湘潭教諭皆以清白自守士有貧乏者以時濟之比歸口不問生產子敦仁敦復敦仁字仲子嘉靖

十七年進士初授職方主事守山海關練兵清戎  
僅五閱月以內艱歸服闋補武庫以外艱歸起補  
武選請托不行出守淮安條上治河方畧備兵遵  
化屯田滇南並著治績遷陝西行太僕卿解組歸  
角巾野服與耆老爲真率會夏則避暑壽元山中  
見者不知爲貴官也敦復字一初嘉靖二十六年  
進士授南刑部郎假歸不出與里人爲經史之學  
以私財設義塾延名師主之年未五十而卒  
魏忠字尙敬處州衛人幼而岐嶷年二十登鄉薦母  
病衣不解帶藥必親嘗以進及終喪祭盡禮訂正

喪禮爲一書士林重之

呂文英孝宗朝以善畫供奉時呂紀以翎毛文英以  
人物屢被恩寵人呼文英爲小呂以別於紀焉  
曹清先世蘄州人正德中由留守衛調處州衛世襲  
千戶正德中江西流賊肆擾調往衢州廣信饒撫  
等處累戰輒爲軍鋒生擒賊首吳設法走其黨吳  
浩之王浩八等斬獲甚衆以巡徼遇賊於梅嶺先  
射殺一人賊大至遂歿於陣

丁瑄先世涇州人由紹興衛調處州衛世襲正千戶  
正德八年征江西賊王浩八等過於裴源敗之追



至梅嶺中伏歿於陣

汪瑛字子修旌德人由處州府官籍中正德三年進士任主事守山海關禁常稅拒流賊甚有時望遷武選郎中疏汰冗員不辭嫌怨陞福建副使勦泉州賊有功會入賀萬壽節卒於途橐無餘資咸以清白吏稱之所著有抱關稿西巖集

葉炆字季鼎年逾冠始習舉業既而博通經史以貢任淮安經歷陞豐縣知縣制服妖賊爲當道所倚工詩善畫別墅在椒山游人擬之輞川卒年八十七所著有遵制錄椒山文集

沈鍊字純甫會稽人嘉靖十七年進士除溧陽知縣用伉倨迂御史調在平父憂去補清豐入爲錦衣衛經歷鍊爲人剛直嫉惡如讐然頗疏狂每飲酒輒箕踞笑傲旁若無人錦衣帥陸炳善遇之炳與嚴嵩父子交最深以故鍊亦數從世蕃飲世蕃以酒虐客鍊心不平輒爲反之世蕃憚不敢較會俺答犯京師致書乞貢多嫚語下廷臣博議司業趙貞吉請勿許廷臣無敢是貞吉者獨鍊是之吏部尙書夏邦謨曰若何官鍊曰錦衣衛經歷沈鍊也大臣不言故小吏言之遂罷議鍊憤國無人致寇

狂猖疏請以萬騎護陵寢萬騎護通州軍儲而合勤王師十餘萬人擊其惰歸可大得志帝勿省嵩貴倖用事邊臣爭致賄遺及失事懼罪益輦金賄嵩賄日以重鍊時時搯腕一日從上寶承張遜業飲酒半及嵩因慷慨罵詈流涕交頤遂上疏言昨歲俺答犯順陛下奮揚神武欲乘時北伐此文武羣臣所願戮力者也然制勝必先廟算廟算必先爲天下除姦邪然後外寇可平今大學士嵩貪婪之性疾入膏肓愚鄙之心頑於鐵石當主憂臣辱之時不聞延訪賢豪咨詢方畧惟與子世蕃規圖

自便忠謀則多方沮之諂諛則曲意引之要賄鬻官沽恩結客朝廷賞一人曰由我賞之罰一人曰由我罰之人皆伺嚴氏之愛惡而不知朝廷之恩威尙忍言哉姑舉其罪之大者言之納將帥之賄以啟邊陲之釁一也受諸王餽遺每事陰爲之地二也攬御史之權雖州縣小吏亦皆貨取致官方大壞三也索撫按之歲例致有司遞相奉承而閭閻之財日削四也陰制諫官俾不敢直言五也嫉賢妬能一忤其意必致之死六也縱子受財斂怨天下七也運財還家月無虛日致道途驛騷八也

久居政府擅寵害政九也不能協謀天討上貽君父憂十也因併論邦謨諂黷贖貨狀請均罷斥以謝天下帝大怒榜之數十謫佃保安既至未有館舍賈人某詢知其得罪故徙家舍之里長老亦日致薪水遣子弟就學鍊語以忠義大節皆大喜塞外人素憚直又稔知嵩惡爭詈嵩以快鍊鍊亦大喜日相與詈嵩父子爲常且縛草爲人象李林甫秦檜及嵩醉則聚子弟攢射之或踔騎居庸關口南向戟手詈嵩復痛哭乃歸語稍稍聞京師嵩大恨思有以報鍊先是許論總督宣大常殺良民冒

功鍊貽書誚讓後嵩黨楊順爲總督會俺答入寇破應州四十餘堡懼罪欲上首功自解縱吏士遮殺避兵人逾於論鍊遺書責之加切又作文祭死事者詞多刺順順大怒走私入白世蕃言鍊結死士擊劍習射意叵測世蕃以屬巡按御史李鳳毛鳳毛謬謝曰有之已陰散其黨矣旣而代鳳毛者路楷亦嵩黨也世蕃屬與順合圖之許厚報兩人日夜謀所以中鍊者會蔚州妖人閻浩等素以白蓮教惑衆出入漠北泄邊情爲患官軍捕獲之詞所連及甚衆順喜謂楷曰是足以報嚴公子矣竄

鍊名其中誣浩等師事鍊聽其指揮具獄上嵩父子大喜前總督論適長兵部竟覆如其奏斬鍊宣府市戍子襄極邊子順一子錦衣千戶楷待銓五品卿寺時二十六年九月也順曰嚴公薄我賞意豈未慚乎取鍊子袞褒杖殺之更移檄逮襄襄至掠訛方急會順楷以他事逮乃免後嵩敗世蕃受誅臨刑時鍊所教保安子弟在太學者以一帛署鍊姓名官爵於其上持入市觀世蕃斷頭訖大呼曰沈公可瞑目矣因慟哭而去隆慶初詔褒言事者贈鍊光祿少卿任一子官襄乃上書言順楷殺

人媚奸狀給事中魏時亮陳瓚亦相繼論之遂下

順楷吏論死天啟初謚忠愍

明史本傳 案鍊以麗水人隸紹興衛題

名碑尚書本貫康熙中請祀鄉賢部議准行

何允恭字克讓其先宛平人改處州衛醅朴寡言笑遇人無貴賤老穉惟謹甥孤恤之甚厚家世工醫允恭益窮其奧每晨興袖藥餌視疾以次徧及未嘗責報獄中苦疫施藥療之沒祀鄉賢子琪字良璧與弟姪同居四十餘年雍睦無間言戚黨乏生計輒轉貸而自償之郡守董公嫌學池迫隘琪捐地以拓之有點徒唱其家人詭稱琪意乞綠波亭

遺址相抵而架樓其上珙自京師歸廉得之瞿然  
曰汝曹欲私古蹟爲已有乎命毀之墟其地還官  
以子鏜貴封刑部郎中

何鏜字振卿嘉靖二十六年進士授進賢令用法不  
阿權貴量移開封府丞釐奸剔弊彊宗爲之斂手  
以能擢守潮陽張璉等構亂計擒其魁督學江右  
勉諸生以身心性命之學後遷雲南參政以乞養  
歸撫按屢薦異才擢廣東按察使河南布政使不  
起投閒數十年而沒所著有遊名山記修攘通考  
翠微閣集郡人祀於鄉賢子應乾字孟陽以貢授

甯海訓導與諸生相礪以古道用薦擢荔浦令未  
朞月解綬歸與朋輩觴詠自娛尤喜獎成後進年  
七十八而終

何琮字良瑞處州衛人積學砥行誨人不倦舉郡中  
文會多所造就陳藝王一卿猶子鏜先後登第皆  
稟其指授者也以貢任撫州訓導士思其德祀之  
名宦焉

牛桓字允武襲處州衛指揮歷陞都督同知忠勤好  
士兩鎮貴州夷人仰之如父母分守江左士民愛  
之所至屢立戰功未嘗妄殺雖晉專閫被服如寒

士云

方存仁先世合肥人洪武中授處州衛世襲百戶嘉靖三十四年倭突犯青田存仁勦於沙步奮勇深入援兵不繼被重傷死有詔立祠死所有司祭祀樂墳先世和州人洪武間以羽林衛指揮僉事調處州衛世襲指揮同知嘉靖中徽人汪五峯通倭寇攻陷沿海城邑墳統兵勦平杭嘉諸寇叙功陞海甯把總巨寇徐明山率倭二萬攻乍浦城甚急墳激勸官軍晝夜巡守賊計窮解圍去尋權浙西參將調征廣東賊張璉江西賊袁三皆有功閩賊陷

興化墳出奇兵攻之賊潰去

案墳以何官赴閩舊志失載

轉福

建行都司僉書平尤溪諸寨山寇捷奏賜金綺支都指揮同知俸授都指揮僉事遷遊擊將軍兼軍門牙將以病歸尋赴召道卒

盧錡先世合肥人洪武中由羽林衛調處州衛世襲指揮同知嘉靖三十四年倭犯內地調赴餘姚台溫江西等處防勦斬級擒生獲器械馬匹無算四十一年浙東倭平叙功授江西都司僉事游陞游擊將軍督兵往廣福交界截勦叛賊會一本於鉛山等處勦捕袁三餘黨以功陞廣東都司四十四

年調征從化白石湖等處山寇救回被虜男婦三百餘口陞授杭嘉湖參將賞紵絲表裏一隆慶四年調征古田賊韋銀豹功奏未賞以老病乞休結屋錦山之陽與士大夫從容文宴以終

朱燾先世句容人洪武中由紹興衛調處州衛世襲正千戶嘉靖中撫臣以禦倭咨訪將材燾膺薦領義兵赴嘉興海鹽乍浦等處戰守有功尋調把守溫州三十八年倭侵樂清燾與參將張鈇往援力戰沒於陣

劉綱先世江都人永樂中由紹興衛調處州衛世襲

副千戶嘉靖三十四年倭犯溫州領兵防守遇賊於瑞安三港力戰自辰至酉斬倭二十餘級賊詭爲官兵間道出山後後先夾攻之綱兵寡不敵與守備劉隆百戶張澄等三十餘人俱殞於陣澄亦

處州衛人

先世章  
即人

詔於死事地方立祠歲時祭祀

胡鳳先世郟城人洪熙中由萊州衛調處州衛世襲正千戶禦倭海乍金盤等處累有戰功嘉靖三十八年倭寇樂清大肆焚掠將取道突溫州城兵備凌雲翼以卮酒屬鳳曰一方生靈付汝矣鳳感激前趨抵賊壘手斃數人相持良久以援兵不繼被

重傷沒事聞贈武德將軍鳳修髯偉貌望之儼然  
而知書守禮雅類儒生人尤惜之子大經以禦倭  
斬獲功累陞山東都司僉書

李承勛先世安遠人永樂中由錦衣衛調處州衛世  
襲指揮同知萬歷元年以倭警檄往撫標練兵法  
令嚴明莫之敢犯九年改領軍門總務十年營卒  
以減餉要挾撫臣民乘間洶洶欲爲變承勛以權  
宜撫定之明年春計擒首惡九人梟示軍門當道  
察其能交薦之累陞遊擊二十三年授薊遼參將  
改留山東備倭會登萊兵聚謀主者束手承勛單

騎入營開誠撫諭立解散去尋推鎮守山東總兵  
官署都督僉事以薦賜一品服提督南北水陸官  
兵備倭朝鮮禁部下毋得取民間一物倭居對馬  
島僅隔一洋聞承勛朝夕操演礮聲殷地不敢復  
犯二十八年班師朝鮮君臣賦詩美之大臣尹根  
壽詩曰昭代須名將求忠孝亦俱每懷酬顧復何  
暇惜肌膚以承勛前聞母訃例不得奔喪剖股肉  
寄奠也還朝賜帑金文綺遣鎮守貴州尋改浙江  
卒子大生侍承勛山東時撫按知其才檄練標兵  
兵幾四千人率青齊土著素驕悍難制大生申明



號令威望甚著擢膠卽營守備營僅軍士九百人  
又老弱大生多方訓練緩急可恃閱三年擢山東  
都司僉書去軍民馳送數百里不忍別爲立祠祀  
之大生之擢守備也當道薦剡云令嚴刁斗操勵  
秋霜涉獵出自儒林韜鈴嫻於將種論者以爲無

忝云

陳遂字宜民孝友發於至性兩奔親喪徒步千里輪  
已產代姪償逋負無德色以選貢授曹州學正致  
仕篤信好學絕迹公門云

盧鏜汝甯衛人嘉靖時由世蔭歷福建都指揮僉事

爲都御史朱統所任統自殺鏜亦論死尋赦免

繫閩獄以故官備倭福建遷都指揮擊賊嘉興敗

責戴罪尋擢參將分守浙東濱海諸郡與副將大

猷大破賊王江涇旋督保靖土兵及蜀將陳正元

兵擊賊張莊焚其壘追擊之後港爲賊所敗賊出

沒台州外海都指揮王沛敗之大陳山賊登山官

軍焚其舟鏜會勦禽其酋林碧川等

案定海縣志禽林碧川係

孫宏軾餘倭盡滅別賊掠諸縣指揮閔溶等敗死鏜

奪職戴罪旋以薦擢協守江浙副總兵賊陷仙居

趨台州鏜破之彭溪乃與胡宗憲其謀滅徐海宗

憲招汪直鎧亦說日本使善妙令禽直直與日本  
 貳卒伏誅倭犯江北鎧馳援破之又敗北洋倭二  
 十餘艘賊斂舟三沙復流劫江北巡撫李遂劾鎧  
 縱賊鎧已擢都督僉事為江南浙江總兵官奪職  
 視事以通政唐順之薦復職如初尋以誅汪直功  
 進都督同知倭復犯浙東水陸十餘戰斬首千四  
 百有奇總督宗憲以蕩平聞鎧復增俸資金鎧擢  
 用由宗憲宗憲敗給事中叩穉劾鎧八罪逮治免  
 歸鎧有將畧倭難初興諸將悉望風潰敗獨鎧與  
 湯克寬敢戰名亞俞戚云

明史俞大猷傳 案鎧  
五世祖寶汝甯府信陽

為都御史朱純所任純自殺鎧亦論死尋赦免  
繫閩獄 以故官備倭福建遷都指揮擊賊嘉興敗  
 四年 責戴罪尋擢參將分守浙東濱海諸郡與副將大  
 猷大破賊王江涇旋督保靖土兵及蜀將陳正元  
 兵擊賊張莊焚其壘追擊之後港為賊所敗賊出  
 沒台州外海都指揮王沛敗之大陳山賊登山官  
 軍焚其舟鎧會勦禽其酋林碧川等  
案定海縣志  
禽林碧川係  
孫宏 軾 餘倭盡滅別賊掠諸縣指揮閔溶等敗死鎧  
 奪職戴罪旋以薦擢協守江浙副總兵賊陷仙居  
 趨台州鎧破之彭溪乃與胡宗憲其謀滅徐海宗

憲招汪直鏜亦說日本使善妙令禽直直與日本  
 貳卒伏誅倭犯江北鏜馳援破之又敗北洋倭二  
 十餘艘賊斂舟三沙復流劫江北巡撫李遂劾鏜  
 縱賊鏜已擢都督僉事為江南浙江總兵官奪職  
 視事以通政唐順之薦復職如初尋以誅汪直功  
 進都督同知倭復犯浙東水陸十餘戰斬首千四  
 百有奇總督宗憲以蕩平聞鏜復增俸資金鏜擢  
 用由宗憲宗憲敗給事中叩梃劾鏜八罪逮治免  
 歸鏜有將畧倭難初興諸將悉望風潰敗獨鏜與  
 湯克寬敢戰名亞俞戚云

明史俞大猷傳 宗鏜五世祖寶汝甯府信陽

州羅山縣人於元至正二十四年歸附明祖授平  
 陽衛世襲千戶實孫英承樂九年調處州衛世襲  
 千戶自此世為處州衛人崇禎元年鏜曾孫聞禮  
 保充承襲冊檔猶在世次甚明史以為汝甯衛人  
 誤著其祖貫耳鏜字子鳴終始禦倭勞績甚著史  
 傳所云僅具崖畧以互見他傳故也今刺取備覽  
 定海縣志所書年歲與史傳小有異同殆轉寫之  
 誤并附綴於後 朱統傳奸民勾倭人互市閩人  
 李光頭歛人許棟踞甯波雙嶼為之主勢家護持  
 之假濟渡為名造大船運載違禁物統革渡船搜  
 捕奸民以便宜行戮嘉靖二十七年將進攻雙嶼  
 使都司盧鏜將福清兵由海門進夏四月鏜遇賊  
 於九山洋俘日本人稽天許棟亦就禽棟黨汪直  
 等收餘眾遁鏜築塞雙嶼而還番船後至者不得  
 入二十八日三月佛郎機國人行劫至詔安統擊  
 禽其渠李光頭等復以便宜戮之閩人資衣食於  
 海驟失重利不便欲阻壞之中朝士大夫先入浙  
 閩人言亦不悅統御史陳九德劾統擅殺命兵科  
 都給事杜汝楨按問統慷慨仰藥死二十九年汝  
 楨與巡按御史陳宗夔還稱奸民無借號流劫事

坐統擅殺詔逮統統已前死盧鏜等并論重辟  
 王行傳嘉靖三十一年巡視浙江奏釋尹鳳盧鏜  
 繫行視師閩中賊大至犯浙江盧鏜等頻失利  
 張經傳嘉靖三十四年五月倭突嘉興經遣參將  
 盧鏜督保靖兵俞大猷督永順兵湯克寬引舟師  
 合戰於王江涇斬賊首一千五百餘級焚溺死者  
 甚眾自軍興來稱戰功第一胡宗憲傳徐海挾  
 兩妾走間道中稍明日官軍圍之海投水死會盧  
 鏜亦禽辛五郎至辛五郎者大隅島主弟也唐  
 順之傳順之聞賊犯江北急令總兵官盧鏜拒三  
 沙自率副總兵劉顯馳援大破之三沙告急順之  
 乃復援三沙督鏜顯進擊再失利俞大猷傳三  
 十六年胡宗憲方圖注直用盧鏜言將與通市大  
 猷力爭不可及直誘入下吏其黨毛海峯等遂據  
 舟山阻岑港自守戚繼光傳嘉靖四十年總兵  
 官盧鏜參將牛天錫又破賊甯波温州劉顯傳  
 協守江浙三沙倭復劫江北顯率兵殄之而巡撫  
 李遂謂賊由三沙來實鏜及顯罪坐停俸外國  
 日本傳義鎮等以中國許互市遣其屬善妙等見  
 副將盧鏜於舟山鏜令禽直以獻康熙定海縣

志李光頭許棟勾引倭奴并其黨王直等結巢於  
 鄞衢之雙嶼港嘉靖二十七年朱公統遣福建指  
 揮盧鏜擊之獲賊李光頭許六姚大窩主顧良王  
 祝良貴劉奇十四等三十二年賊舍舟登普陀山  
 俞大猷等復攻之潛遣奇兵由北巡檢畧直入百  
 戶鄧城武舉火斌黎俊民陷陣先登賊又敗走茶  
 山絕頂翼日城等四面俱進大勝環守之決旬值  
 他島賊至鼓噪四合火斌黎俊民死焉參將盧鏜  
 於石墩洋邀擊斬首二百餘級賊始退三十四年  
 賊遣徐海入寇六月參將盧鏜敗賊於馬鞍山復  
 追敗於龜鼉洋八月擊賊於金塘山九月倭餘賊  
 據舟山謝浦指揮閔溶等攻之勿克死焉三月五  
 年三月參將盧鏜知縣宋繼祖等會兵進攻賊稍  
 却時王直遣王激等抵關効力胡總制即遣激等  
 同盧鏜勦之盡殲焉初徐海由乍浦口入寇蘇松  
 嘉湖官兵不能禦胡宗憲以計誘降遣其親愛將  
 辛五郎歸舉招直八月舟過金塘宗憲計令盧鏜  
 錢而盡殺之三十六年直統諸島倭泊舟山岑港  
 稱降時副將盧鏜守中中所城外倭刃森列鏜慮  
 變堅壁以待不肯啓鑰把總劉朝恩曰使之疑我

是激禍矣不如以誠招之鏜從之朝恩至賊所反復開諭直遂單騎入見盧鏜

盧相鏜子鏜禦倭數十年相未始不在行間勞險之事幸以委相相聞命即行蛟窟鯨波無少疑憚王江涇之捷時稱軍興戰功第一相實為先鋒鏜統烏尾船勦賊仙居相復為先鋒克其城徐海之敗也大隅島主弟辛五郎遁烈港海洋鏜遣相邀擊生擒之獻俘京師摘叙王江涇功授處州衛指揮僉事先是鏜躡賊九山洋擒其酋哈眉鬚滿咖嘸稽天等并獲其烏銃機械精利令相窮竟其術至是遂留神機營教習諸軍功成陞浙江都指揮僉

事守備儀真汪直既誅其黨毛烈李華山突至石

浦八排門聲言復仇瀕海震恐鏜檄相督兵攻沈

其船俘其妻妾焚溺死者無算旋計前後斬級功

授浙江都指揮以終案相孫聞禮保送存襲冊檔頗著相績而明史不詳故授

其大畧書之檔中書鏜事與史互有詳畧而一無相戾者知相事亦非虛美也

王葑字德敷嘉靖己未進士觀政刑部接丁內外艱

廬墓側者五年跬步不入私室竟以毀卒時臨川

湯顯祖令遂昌為哀辭云謂天道有知王孝子無

祿謂天道無知王孝子有鹿以墓廬曾有馴鹿之

異也後祀鄉賢子良詩良聘並有雋才

鄭浙字子東嘉靖三十一年舉人歷知東平耀州以  
岷府長史致仕杜門謝客服御無華子芬任清流  
訓導轉甯海教諭致仕歸淡於世味有父風云  
戴鏜本姓高後於戴以貢授華容訓導蔡系周者貧  
而孤且髻也鏜曰是非凡才也收而教之旋成進  
士有聲臺中世服其知人游陞松溪令有筦庫吏  
坐失藏鏜繫獄鏜至閱庫傍地陷一竇循其迹則  
輿夫所館也一鞠而服人以爲神子濂爲郡守有  
循聲

戴濂字希茂鏜長子嘉靖四十一年進士授行人移  
比部慮囚陝西多所平反擢知饒州痛懲豪猾境  
以清靜萬歷元年分校江西稱得人以忤時調簡  
潯州罷牛稅減鹹錢嚴發豕挾贖之禁潯俗爲之  
丕變丁內艱歸起補袁州杜絕請謁以文學課諸  
生年方五十移病歸父性嚴毅婉曲承順務得驩  
心濂孩提喪母旣長哀思形於寤寐手繪母像極  
肖人以爲純孝之感也

戴聰字德卿處州衛人工醫未嘗取利會大疫得診  
治輒瘳全活無算直指郡邑迭表其間

呂鳴珂字蒼南嘉靖二十八年進士歷官中外所至

以廉能著雖占籍順天而遇鄉曲故舊情意周浹  
官至工部侍郎以盡瘁卒於官贈尚書子祭葬  
葉堯禎字瑞卿由舉人授宜黃知縣以剛介忤當道  
去起補巴東以愛民節用爲務尋擢廣西梧州通  
判不赴巴東民立祠祀之著有石川稿家禮便覽  
單槐處州衛人天性篤摯貢入太學以母年老不忍  
去母病躬親湯藥日夜忘寢左目遂失明嘗冒霧  
渡溪延醫失足墮水適漁人救之得不死子熙載  
以恩貢授陳州同知涇謹有父風

何燾字思仁少以聖賢事業自期督學萬公選入萬

松書院以鄉薦授新喻教諭教人務底實用聘主  
湖廣鄉試號稱得人擢信豐令以寬仁爲理民常  
見思居家未嘗干有司所著有四書集義春秋誅  
意效顰紀滄螺錄青桂軒集

張榜字汝元處州衛人以祖父死難蔭千戶少業儒  
通大義初襲職委管團操禦倭瑞安有功陞松海  
北總歷江西都司廣西潯梧參將勦平狼寇又勦  
上林三畔等猺斬獲無算陞狼山副總兵督兵赴  
朝鮮應援事平留守比撤兵還無秋毫擾民榜自  
束髮從戎以至分閫不營生計身沒之日囊橐蕭

然

聶瑩得湖州凌漢章鍼法雖厚衣可按穴定針針至病起未嘗責報時稱神醫云

吳伯參精太素脈指人福禍修短無弗驗有脈宜死者為定其時日至期無爽

王三接字汝晉處州衛人天性孝友父患怔忡侍湯餌先意承志為廣臬照磨以母老乞歸嘗經石牛渡舟中拾遺金驗為縣吏輸官物攜歸代納之而粘票櫃側不使知為已也家居三十餘年壽八十餘而終

鮑知仲字締叔幼侍父入京謁選舟渡黃河父溺知仲躍身往拯浮沈數里竟以俱出母疾刲股療之妻葉氏亦孝養備至郡邑以兩賢濟美旌之子坤順副榜貢生亦嘗刲股救親督學聞而獎之

劉廷胤字永光諸生孝友端恪治喪不用浮屠親族無力婚葬者資助之年七十九卒五子六孫皆列庠序

高文景字仲陽處州衛人母病刲股籲天願以身代既喪停柩寢室夜半聞母大呼好看我須臾隣家火起景撫棺號慟火至舍傍而止葺廬守墓虎夜



銜承遺之人以爲孝感焉後以貢任廬州訓導陞  
潼關教授

高岡字子升文景子嘉靖三十一年舉人初授金溪  
令陞臨江別駕轉南康俱有政績以乞養歸適弟  
逋官賦就繫卽爲代輸親族有喪厚賻之凶年出  
粟賑貧乏姪貧爲婚娶知縣樊良樞以世德扁其  
廬卒年九十六祀鄉賢

陳懋儉字舜嘉幼孤母沒廬墓三年平居謹慎自將  
步趨咸中繩尺由興化訓導歷常州教授諸生有  
貧不能舉其喪者捐金助之尋致仕提學飭府備  
禮儀鼓樂壯其行色旣歸營葬其兄甚力時稱孝  
友者必推懋儉云

劉大烈字思武事繼母以孝聞由合肥訓導游陞南  
康教授與諸生情意款洽濟急不責其償貽書子  
姓以妄求爲戒晉周府紀善致仕子世用醕謹有  
父風亦善事繼母云

吳文榮字汝仁沈潛嗜學聲名藉甚以歲貢中北闈  
乙榜任撫州訓導又中江西乙榜以能薦旋卒  
葉璠字龍淵隆慶六年旱甚民拾草實爲糧知府吳  
善富知縣吳觀周請於大吏發常平倉賑之猶不

足璠出私粟為助全活甚眾詔旌其門

王敦儀字應望先世田青田徙郡城遂隸籍麗水性

至孝大父以力學凶大母聞伊唔聲輒歛歛敦儀

恐傷其志嘗夜篝燈手抄以代讀後下帷法海寺

歸省遇持金釧者中暑仆地恐後人攫取坐守以

待其甦展墓青田適盜伐其樹禁從者勿聲慮其

驚而墜也人咸德之相戒勿樵王氏山以子一中

貴贈太僕少卿天啟六年崇祀鄉賢

從入祀  
檔案正

案雍正府志  
作青田人今

吳應期字世昌篤志潛修與弟應斗自相師友有扣

之者應如響門下士多所成就操履純固不為苟

合亦未嘗有所忤以貢授淳安訓導遷容縣教諭

未赴而卒

葉志淑字子善家貧力學尤精三禮灌汲自資不妄

交游中萬歷十年順天鄉試由靜海教諭陞虹縣

知縣歲餘以持正忤當道致仕歸逍遙林下怡情

吟詠郡守宣城許公聘修續府志

呂邦耀字元韜萬歷二十九年進士選庶吉士改給

諫丰采甚著提學河南得人為盛擢通議封駁得

體轉奉常歷大理未竟所用而卒

楊瑞字汝賢處州衛人博通經史以歲貢授羅源令  
歲大祲發粟賑饑者全活無算在任六年賢聲茂  
著以忤當道左遷潯州通判遂拂衣歸構凌翠樓  
於菱山讀書課子以終

王一中字元樞萬曆三十五年成進士授知縣歷古  
田新蔡杞縣皆以廉著擢廣西道御史疏罷內市  
發中官懸繩內盜等弊巡按山東因地震直言保  
姆客氏權璫魏忠賢奸惡白蓮教匪李某倡亂與  
巡撫設法勦擒之陞太僕寺添註少卿復與京堂  
連名疏璫惡忠賢故積憤因會推謂其與楊漣左

光斗同年以依附門戶矯旨削奪忠賢誅起故官  
改光祿卿以不附時要調南光祿卿卒於官郡人  
祀諸鄉賢先是一中令古田出罪人陳宏德於獄  
旋登賢書閩人尤樂道之祀於名宦焉一中於經  
史稗官靡不探討尤以道德性命之學爲亟所著  
有瑞芝堂集經書疏解東巡疏草祿勳疏草柱下  
焚餘靖匪錄諸書子胤昌胤昇胤昌字長文有孝  
聲工詩以恩貢授推官胤昇字仲方幼穎異母潘  
淑人病瘧山水斗至胤昇從深水中負出之甫出  
而牆圯兩爲副榜貢生考授通判年八十四乃卒

陳應元字菊庭善醫明季時邑苦疫應元所活甚衆  
藥不計值人尤德之子啟慧啟秀傳其術著經驗  
良方爲醫家所宗

易文字宗周應龔衛左百戶棄而儒爲府學生性至  
孝父方浴以中風卒文遂終身不浴由貢仕至益  
府教授王世子甚重之居家恬靜自得數舉鄉飲  
大賓

程錄字文式事親能先意承志父沒厚資嫁其婢待  
庶弟有恩析產自處於薄遇戚黨情意周洽有司  
以孝友扁其門先是錄父應龍以耆德賓飲於鄉  
至是錄繼之人以爲世德焉

葉世瑞字汝賢言動必於禮法由歲貢授松江訓導  
轉泰順教諭歸州學正所至諸生頌其德投老歸  
里足跡未嘗至公門焉

耿鏞字良忠性謙謹遇童穉必以禮諸姪有不能自  
給者以私財資之鏞故泗國公再成六世孫以劉  
基胡深二祠有司歲時致祭而耿祠闕如援例以  
請部議允行有司屢延賓席卒年八十六

張率孝字立愛處州衛人家貧力學有聲庠序父爲  
讐家所誣將置之死率孝匿父就訊備受摧辱重

跣走訴大吏寃得白以易學教授於鄉

陳守字子約爲貴池丞廉潔自持愛民禮士旣歸林居數十載不謁公庭不履廛市知府任可容舉鄉飲禮延縉雲李參知爲賓李曰得陳子約爲介當赴之耳其爲時所重如此年九十餘卒

許成義處州衛人孝友醇謹以貢授開化訓導轉望江教諭與諸生講課不倦兩地俱立碑以志其德李鶴以貢授錢塘訓導轉餘姚教諭所至飲人以和士樂就之精星歷推步析及秋毫家居蒔蘭種菊翛然物外年八十餘卒

汪應濂字希宋操行醇謹孝事二親以貢授金華訓導課士多所成就轉南昌教授移疾歸

葉蓁字盛卿敦孝睦族撫孤姪分產贍之卒有成立以貢授建昌訓導未期月卒

潘璋字良用任蕪湖巡司權稅秋毫無私爲□□王思任所重比歸囊橐蕭然重義急公督濬好溪渠備盡心力東鄉賴之

何其美字汝器處州衛人弱冠爲諸生事繼母孝弟恃母愛不恭其美友愛愈篤弟以事被繫傾囊營救得釋人尤多之

王應瑞砥廉隅敦節義親病刲股以療親沒善撫幼弟迄於成立家居恤窮困創橋渡鄉里賴之

王化民字育卿早孤事母孝務得其歡心工文藻守令皆以大器期之卒不遇既老孝養不衰授諸暨訓導卒

葉節字子高隱居篤行以孝義著於鄉

陳嘉陞字貞所幼失怙事母承顏怡志年十三遊泮絕迹公門六舉優行邑令樊良樞甚重之

蔡隆遠字思泉任安慶知事有政績致仕家居儉素自安不問外事年八十而終

葉榮字本仁諸生勇於為人稱貸不能償者焚其券友死則恤其孤親族貧不能娶者助之資督學郡守先後旌其門

梁仲彩孝事母訓諸弟姪必以厚幣致碩師後皆為名諸生鄉里有忿爭者得片言羣囂立釋遐邇推長者焉

張愛字子仁以孝友著名勇於為義焚券恤乏施棺掩骼延師以訓宗族修路以便往來里閭稱之

張鶴翼字鳴臯早孤事母以孝聞與從兄鳳翼以文行相砥家居河步有徽商以幣物見寄而身往甌

中適火災鶴翼先出所寄而不問已資商聞變至則一無所失生平以禮義自守與物無競人亦莫有忤之者

陳嘉鳳字子祥伯父宦閩中攜與俱以思親力辭歸父以餘資與之悉讓於兄喪葬祭祀皆身任之學使屢旌優行焉

張學甲字思過爲諸生有名方國安潰兵掠括郡避亂於鳳山後寨偶出爲兵所獲脅之曰引我至寨當免爾死學甲厲聲叱之伺間投淵死

葉伯仕字行可以博覽著稱赴省試途遇父子求死

者詢之則爲人肩運喪其貨於黠匪也遽出橐金償其主者而去抵省病甚夢神人褒其前事已而霍然

張漢傑字希房處州衛人幼孤母令讀書白雲山寺卽欣然攜蔬米往天啟七年領鄉薦四上公車不第家無贏餘而聚書不倦生平不道人短遇之如坐春風焉

續蒙勳字世階先世聞喜人洪武中由紹興衛調處州衛世襲指揮僉事膂力絕人馬上運槩如飛禦寇甌中水陸二十餘戰斬獲三百七十有奇生擒

百餘人聞母病遄歸服闋陞粵東白鶴門總擒倭  
寇百三十餘斬首二百級遷都閩坐營合勦瓊崖  
黎寇以功最陞西山參將撫土司有恩兼攝東山  
四年轉湖廣鎮筵兼制九永荆湖等處土司入犯  
禦之斬級五百生擒二百五十餘舊例解以請功  
蒙勳曰徒膏斧鑕耳令土司歸所掠生口自贖閱  
二年歸歸二十餘年而卒壽八十  
續孔教字庭授蒙勳子萬歷四十六年中副榜旋襲  
父職改溫區營總待士有恩陞浙西漕運都司搜  
革積弊漕政一清以侍養歸父卒哀毀已甚繳符

兩臺不允強起視事南都以方國安假擁戴魯藩  
名索餉諸郡事敗潰兵至栢孔教營糧久乏無以  
應遁居海溪山中浙中歸化孔教猶初服已而收  
者至孔教手刃男女若干人隻身就逮受刑武林  
市先一日爲絕命辭曰生旣盡倫死亦完節緬百  
代之儀型俟千秋之袞鉞嗚呼取義成仁庶幾乎  
聖賢之事業以屍托李孟翰葬於父墓側當道允  
其請焉

陳昌蔭字五昌崇禎中充歲貢

國朝順治三年方國安潰兵蹂躪栢郡昌蔭奉父母避



於風山妻奚氏遇賊投崖死父傷足昌蔭躬負以  
行父沒撫兩弟成立均產以給之平居足不出戶  
外當道欲見之不可得益以遺民自處也

章射斗字文登弱冠入郡庠性敦厚屢舉優行事父  
母尤孝敬父沒善撫其庶弟婚娶畢析產取瘠田  
嬴僕舉賓筵卒年七十九

陳萬言少英敏試輒高等博綜經史尤工詞賦賚志  
以沒時論惜之

李應春字次白諸生少穎悟淹博羣書善古文詩詞  
而制行瀟灑有古風知府朱□□延修郡志未就

而沒

麻一琴字和齋穎悟博學試輒冠軍著有四書正說  
易經解訓行世

辜存衷字元表博極羣書數困場屋教授生徒出其  
門者率多名士經史皆手自評註尤長於詩所著  
有甌廬草蓮甌子等集

丁啟宗字孟熊處州衛指揮幼有至性嘗刲股以療  
父疾出爲鹽城守備擢鳳口遊擊擒叛將劉超劉  
越獻俘京師超陞紫荊關總兵後軍都督府僉事  
闖賊臨關諭降啟宗斬其使城陷不屈死標下官

蘇聘收屍藁葬僕丁富棺而歸之事聞于卹蔭

國朝

許王聘字簡茲諸生母病刲股以療病旋愈女兄弟  
三並厚其奩飾以慰母心

湯天祥諸生事親至孝父病癱天祥口吮之半載而  
愈母復嬰痼疾天祥禱於神不肉食者三年母病  
亦愈當道以篤孝旌其門

王繼祖字爾志明南光祿一中孫孝子眉昇子居父  
喪水漿不入口與諸弟分產獨取礮瘡康熙十三  
年耿逆倡亂閩中延及栝郡與子運乾俱陷賊不

屈賊壯而釋之七年舉於鄉十二年洪水煮粥以  
食餓者濬通濟渠以興水利知府劉廷璣嘗聘修  
府志後考授內閣中書卒著有芝山文集

王任祖字覺斯仗義有爲鄉民李官壽以貧鬻其妻  
任祖責以大義傾囊贈之平居正直自守遺命不  
作佛事

王學祖字而敏明南光祿一中孫孝子眉昌子幼孤  
自知力學髫年入邑庠避耿亂猝遇賊負母以逃  
母得疾刲股療之兄宏祖艱於嗣學祖賣己婢爲  
兄納妾焉

梁天成字蒼培母老而瞽兄弟三人皆貧無產天成獨膳之已恒有饑色而母甘旨無缺也邑令廉其孝友延爲義塾師充雍正三年歲貢比卒不能具喪門人醵金葬之

汪起綵字震先與兄起紳俱善事孀母以孝聞康熙初聞逆陷處州起綵避兵陳寮山中或謂同知趙瑾爲賊所指目今在此恐速禍欲縛獻之起綵曰趙公義不降賊端人也曷若護而去之乎遂間道送往他山明年趙隨親藩統兵至召起綵兄弟欲官之固辭不受趙後官真定奉金爲壽復不受乃

旌其母苦節以報之

徐震字啟亨諸生中夜盜執其父震方患痘越水呼救母病刲股療之足不入公府而設社倉造船梁恒存心濟物知府劉廷璣重其品舉爲鄉飲大賓陳大鶴字鳴九諸生事繼母孝撫幼弟慈以禮接人言笑不苟精岐黃術未嘗言利學政王□□以孝友旌其門

錢金生字秋水幼孤而貧母楊氏以紡績佐讀崇禎十二年以春秋登鄉薦

國朝順治中授嘉善教諭弟子稱白鹿先生歷遷陵水

會甯令多善政卒於官囊橐蕭然士民泣涕賻助歸其柩焉

錢湛字公露金生子秉性端謹無疾言遽色讀書晦明弗輟於六經諸子無所不通康熙三十二年舉於鄉任蘭谿教諭出其門者多有師法

錢元爇字茗夫金生曾孫以拔貢充教習授知縣歷任隴西甯夏諸縣擢固原知州以憂歸起授岷州改涇州稱疾歸其在隴西濬小西河十餘里以巨石隄其險要居人免於汎濫名之曰錢公隄鄉民王鳳翔誣人毆死其子獄具而尸弗得元爇墜榜

於衢曰獲王某子者予重賞已而果得其子匿所反其獄衆以爲神葢岷州新其廟學工竣有四鶴來巢故事歲豐歉以季夏爲定秋災毋得報元爇請於大吏夏秋分報遂沿爲例民尤享其利焉  
辜景臯字愷六才識通達聞見博洽著作甚富知府劉廷璣極賞之以明經終

陳大受字子宏拔貢生倜儻豪邁博極羣書詩文援筆立就累試不售晚歲築樓曰問天藏其生平著述以寄慨焉

楊金生字協恭篤學好古詩文皆醅雅教授生徒最

以實行不僅爲詞章之學以明經終

葉應鸞字漢翔賦性恬靜文詞淵雅以貢授仁和訓導未赴而卒

陳象乾字天如幼喪父孝於其母少長以名檢自勵能濟人急以貢生歷官貴陽知府

張翀字體乾少孤而貧能自立以拔貢授羅源知縣時耿逆開藩家丁倚勢爲奸莫敢忤翀執而治之其黨惕息聲振八閩卒於官民護其柩以歸

吳奇珍字樸初順治八年舉人授歸安教諭以時課諸生衡其高下而資之士論翕然分校南闈常熟

蔣廷錫出其門人服其藻鑑之精

吳奇標字錦先以貢生授福建邵武通判署政和縣事時閩中初定民多流離失所奇標安輯有方邑以稱治卒於官宦橐蕭然

朱珍字聘公鄰火及其廬珍自外至犯烟燄掖祖父以出有侵其地以築室者恐傷父意置弗問家貧授徒數里外朝夕定省無闕三十餘年如一日焉朱上杞字樵兩年十三爲諸生刻意勵行思有以自拔父沒廬居墓側晨夕上食如生先是校中諸老儒學爲詞章守師說爲科律上杞輒非笑之至是

亦非上杞作偽沽名無何以孺子泣病瘖乃嘆爲至性過人也青田韓錫胙爲之傳

戴希良字鑑溪乾隆中以歲貢生授長興訓導諸生謁見諳諳以禮義爲勗春秋享祀先期齋沐具品儀必如法課士之暇攜琴訪佳山水嘯詠自得以老乞歸郊錢者莫知其數長興縣志稱其清白廉介不涉勢利益實錄云

薛士梁字梓材歲貢生家僅中人產旣與弟異居弟耗其財以卒妻湯氏年少誓不嫁士梁盡推已由與之復爲經紀以字其孤湯全節以終

何廷友諸生乾隆十九年歲饑爲粥以食餓者次年復歉廷友力不給貸諸鄰以賑之知縣陳證表其門

王棟字殿臣少孤善事其母旣長忼爽能濟人急松陽令朱肇端以公誤去官挈眷屬依棟閱五載厚資送之隣龔甲傲棟舍以居死不能具喪棟猝無以資輒曰鬻爾舍可矣圃人以貧病鬻其婦行有日矣棟聞之爲償其聘錢晚歲遺世事讀書自適嘗語人曰吾其學諸君率致身通顯今皆下世吾獨以不材獲全幸矣因自號半癡叟年八十二而

卒

徐學詩歲貢生以經史教授里中垂四十年秉性端  
慤雀鼠之爭咸爲平之乾隆中縣令張士楹榜其  
里曰無訟村

朱濱字關溪不求聞達行善於鄉時戚屬之急者而  
資之財歲凶則與無業者田而薄其征有代兄書  
券質錢者旋沒司藏者以爲言濱曰故非若負也  
奚責爲遂焚其券母嬰痼疾蓐處累年濱與其婦  
周左右在視不假婢媪里中以篤行推之

黃繩先字紹庭以副貢授泗洲判屢獲巨盜保陞知  
縣格於例不卽授歷署劇邑有聲嘉慶十四年授  
蒙城縣縣遭亂邑里蕭條繩先多方招來之流亾  
漸集無何大吏令鬻叛產補軍需繩先建議謂叛  
產蕪萊未墾無受者宜姑緩之不得請移書故里  
鬻已產以充之以獲鄰盜膺卓薦尋卒子中寰中  
字通理以縣丞需次福建道光六年夏隨總督孫  
文靖勦辦臺匪及濬鹿港開五條港皆有功補崇  
安縣丞署將樂知縣卒於官寰守體元以縣丞試  
用山東曹州府會教匪林清亂後尸骸委野寰捐  
金瘞埋旦夕督視之以勞瘁卒

葉秉禮字耕之拔貢生以四庫館膳錄議叙縣丞分發福建攝海澄丞時林爽文亂臺灣大兵進討海澄地居衝要兵使絡繹秉禮不辭勞勩事至立辦無何同安蘇葉倡亂漳郡戒嚴秉禮晝夜登陴不遑寢食月餘乃定五十九年大水長泰南靖等處被災尤甚糧道往賑檄秉禮與俱諸事委任之所至稱平明年復大饑漕廈門粟以濟秉禮泛舟往來閱數月不倦嘉慶二十年擢惠安知縣縣海疆劇邑號難治秉禮撫綏得宜有慈君之目俸滿加通判銜秉禮性耿介不迎合上官意故筮仕四十

年僅得循資除授比卒宦橐蕭然

何棣字韓堂由烏程訓導陞龍游教諭在職以清操著嘉慶中致仕年八十餘力學無倦容嘗取先儒易主无咎无咎在補過之說繪讀易圖以自勵焉吳壤六歲時以母病誓於神永斷葷血父病刲股以療十三歲卒

陳的喜父癰發於莖溺不得通張且死的喜承以口而吮之每溺以爲常竟以愈

戴金垣字爾庚貧而好學九工經藝時學使諸城竇光鼐嚴於持論特賞金垣文謂可程式爲刻行之



嘗封股療母疾人稱戴孝子弟金南字赤寶好聚碑刻善別古器物真偽以書法名於時金南子琛好吟詠著有雞肋詩草

呂亦調字協六拔貢生善事後母撫異母弟二人皆成立兄已後於人耗其財勒析亦調產亦調聽其取給而授徒終老無怨言焉

王惟球字序東以拔貢生授州判需次甘肅嘉慶初征白蓮妖匪於湖北大帥調惟球隨營左右戎行甚有勞績署黃梅知縣修建潘興口江隄四百餘丈護田數百頃民勒石頌德旋補鶴峯州判有張

有本者坐殺人逮繫二十年獄不具惟球奉檄往鞫得其兇咸驚以爲神白蓮匪平以功題陞東湖知縣格於例不果調歸州判地有灘極險春漲時覆溺九衆惟球增置救生船選長年最能者司之拯濟無算同知張某運滇銅至灘舟壞且求死惟球營救資遣之調署興山知縣改隨州唐縣鎮判猾賊戴么等賊累巨萬積年名捕不得惟球立擒三十餘人民爲建生祠祀之年餘調署鶴峯知州卒惟球工書能篆刻雖處煩劇操翰不輟性尤好菊故所著印譜詩集皆以冷香名之

王經根字培六廩貢生隨父惟球鶴峯任方伯周公聘掌書記奇其才入覲摯以赴都遇特科考列二等授縣丞分發安徽歷署靈璧諸縣有惠政百姓謳思焉

王正燦字懋昭嘉慶初以諸生舉孝廉方正少端謹以篤行力學聞弟早世無子妻以身殉正燦卽以已子後之而撫其二孤女比長厚嫁之歲饑知府涂以冊發常平倉粟糶之不足欲運於溫而難其人正燦力任之佐以私財泛舟相繼他日置義倉復輸穀千斛爲倡修好溪堰濬東北二水道皆不

辭勞費遇人抑然自下未嘗多其行能焉

翁開宗字維本嘗爲外祖置祭田以慰其母里有鬻妻者予以資俾完聚疾革命子取故舊借券悉以還之嘉慶中知縣表其門

董迪字惠吉以優貢生授鎮海訓導有豪行生善刺人隱事要挾蠹起因以爲利迪察其尤者嚴懲之宿習爲之衰減以薦授都勻經歷都勻故盜藪迪至數月盜屏跡會以憂去盜熾如故守太息語人曰天下健者洵惟董公矣服除補大名經歷先後總督蔣攸銛那彥成皆嚴於弊吏顧謂迪能留省

委用以勞陞知縣署昌黎縣事巨盜郭憑陰與吏通更數健令不能得迪抵境投牒者率言憑迪曰憑猾賊非吾力所及且吾非真授行去此姑待能者可矣投牒者詞益彊迪好語之曰我實不才以遺父老憂幸父老諒我竟返其牒衆譁笑去莅治月餘初不言盜一日密語營弁曰亦知郭憑踪跡乎曰知之迪曰若爲弗聞也者何也弁曰向者令草芥遇我我亦膜視之辱公體貌我當爲盡力耳遂昏夜率健卒往立擒之譁者大服尋病卒著有菊軒詩草

許可字與之少爲諸生有聲父疾癰閉危甚可跪而吮之凡月餘卒不起初醫者謂父已衰法宜用人葢從之益以劇至是知爲傷暑藥與證違大悔恨曰今而知爲人子者信不可不知醫也聚方書晝夜讀之遂通其術有求診者應手取效未嘗責酬母年垂八十兩足病瘡可親燭湯請洗日再四竟以獲痊侍養終身不復圖進取焉

王尙廉字子貞幼孤而孝晝夜挾冊依其母暇則代母親庖爨澣濯以奉其祖母少長爲諸生家酷貧介然自守不以干人郡守涂以輶甚重之語人曰

王君文美矣然秋肅之氣愈於春溫恐不利名場耳會大疫祖母母相繼歿尙廉侍病積勞繼以哀毀嘔血而卒

王尙忠字蓋臣五歲而孤少長爲諸生精潔自好恒佐治州縣幕以養其母遇事明敏無滯主者倚以爲重家居嗇於自奉而赴人急難雖燎毛髮所不辭嘗曰吾非好爲矯情以幼時曾貸百錢不得沒齒不忘也里中社倉耗於游食尙忠經營鉤考復以充裕他公舉利人者輒身任其勞雖怨家服其公廉所著曰芝庭詩稿曰哀餘問答凡若干卷曰

栝蒼金石志則與嘉興李遇孫里人王尙賡共成之者也

閻秉義字中和幼侍父台州都司任所遂嫻武事由外委游陞甯波城守營守備俸滿以曉暢營伍薦有大賈覲教場隙地欲取爲利知秉義且卸事致千金求銷冊檔秉義峻拒之會府詣勘樹碑定界焉尋陞廣西左江都司左江舊設巡船以防水盜歲久視爲文具秉義至飭屬募水手更番偵緝以獲盜多寡給功過執照爲殿最年餘捕盜數百舟行得安枕調江右上林擢隆林遊擊駐劄八達八

達距州城二百餘里逼近交趾土人與猺獠雜處俗獷悍不知誦讀又信巫鬼病不服藥死則以火化秉義爲置義塾延師講習勸立藥局造棺槨俗漸革道光十二年署鬱林參將適廣東猺匪滋事防勦兩廣接壤之丁堂卡上黎鞭子冲等處始至猺匪偵知我兵單乘夜捨渡秉義伏兵下流突起掩殺斬獲甚多明日提督蘇紹榮領大兵至賊已遁去紹榮令搜捕上黎等處以請功秉義謂是皆順猺不宜擾之紹榮厲聲曰有謂順猺不宜加兵者以失誤軍事論秉義立繳關防待罪而密報左

江總兵文哲輝哲輝亦力持不可紹榮氣沮乃止協揆兩廣總督李鴻賓聞之譴紹榮而深獎秉義委署潯州副將十四年推陞山東濟南參將以疏濬城河功部議加一級十八年召見記名以副將陞用明年以母老乞養歸遂不出卒年七十五母後二月卒年九十八矣

葉攀鱗原名攀龍字振飛以優貢生授知縣署湖南興甯縣事精力強果不畏煩劇勘驗至鄉恒自攜炊具從者量地遠近給直不以供張擾民循行阡陌視力農者而獎之民大勸郴州饑檄取興甯米

民以興甯纔自給懼而誨攀鱗言於州謂取興甯  
米濟邨不足而興民告匱且兩擾事得寢縣有牛  
子凹爲盜藪數十年攀鱗親往搜捕盜解散去調  
湘潭治如興甯卒於官攀鱗性機警應事如轉圜  
所至得民旣去輒爲樹碑紀績其去興甯也百姓  
攀轅涕泣撰爲歌謠有刁徒蠹役皆知畏清似水  
兮肅似霜云云蓋實錄也

金釗字勉齋以行伍授外委千總貌恂恂類儒者而  
膽力剛決道光二十二年隨處金總兵官鄭國鴻  
勦暎夷於定海曉峯嶺轉戰而前被礮陣亾事

聞賜世襲雲騎尉

譚學鎔字範金少穎敏工詩爲諸生遊學於杭歸益  
勵學購書數萬卷假觀不吝篤於故舊緩急可恃  
有貨重金以遊者閱數年擁厚資歸置前負不言  
學鎔遇之如初人多其雅量焉

陳登朝邵金館人父歿廬於墓以孝稱道光二十六  
年知縣張銑以純孝詳請奉

旨建坊

錢錕歲貢生學問淹博孤潔有隱操父爲戶部郎錕  
隨侍父歿扶櫬歸杜門却掃不干世譽服闋觀察

某公贈以金勸赴秋闈謝却之錢塘許氏銀母家也貴顯冠一時屢書招致不報投徒里中嘗曰制藝雖小道然非熟讀經史則胸襟淺鄙豈能代聖賢立言哉總兵梁勝灝聞其賢往謁之不見餽之亦不受歎息而去卒年七十二學者稱蘭坡先生徐望璋字達珍幼穎敏讀書日千言長益嗜學家貧無力購書館於碧湖湯氏湯故多書雪鈔露纂無虛晷詩古文詞皆入古人室嘉慶辛酉拔貢丙子舉於鄉主講蓮城十餘年出其門者皆有師範授武義教諭潔已愛士武人士至今誦之以足疾告

歸年七十餘矣嘗誦明人學道終身只學貧句語門人曰貧豈待學學者乃能貧耳卒年八十二著有芸亭詩鈔

王尙賡字雲舫諸生內行純篤尤重友于之誼性孤高平居以圖史自娛善書畫癖嗜古几斷碣殘碑必剔苔蘚摹之著續枯蒼金石志四卷麗邑向無志乘賡獨留心采訪鈔錄甚夥道光二十六年修志皆其力也卒年五十八里黨咸痛惜焉

張芳年字子來諸生幼孤母鍾愛之至性天成一日鄰人不戒於火芳年甫六齡號泣牽母出俄比舍

延燒芳年屋獨無恙讀書敏悟出筆卽有理致長  
更博學工詩尤精駢體道光癸卯省試甫畢心動  
卽襪被馳歸而母以前三日病亾號咷擗踊痛不  
欲生遂絕意進取平生寡言笑而遇事敢爲他人  
不能決者以一二語折服之卒年五十六著有富

山堂詩鈔

朱有章字文煥拔貢生 朝考一等授四川知縣歷  
署奉節鄧都新繁梁山諸邑所至有惠政百姓甚  
愛戴之權夔州府事護理鹽捕府題補大邑縣星  
夜從公積勞成疾母又春秋高遂告歸上憲及同

察餞其行旋里被服如儒生足跡不入城市積書  
數萬卷口不絕吟咸豐十一年城陷賊檄有時望  
者充僞職必欲得有章章見檄大罵焚之率勇捍  
禦徙母居九盤山日一往省賊偵知潛伏山下章  
適奉母他徙賊焚山蔡而去同治三年卒著有燼

餘殘稿

徐紹典字繼虞歲貢生性至孝讀書務求根抵嘗負  
笈錢塘師事周芾堂先生講明身心性命之理學  
益粹省試屢薦不售意豁如也獎誘後進常若不  
及人咸尊禮之卒年六十三



葉雲蛟字乘風歲貢生敦厚謙冲遇人必以禮攻苦力學至老不衰赴秋闈十餘次有誦讓之者不稍阻咸豐十一年避亂山鄉忽一日沐浴整衣冠屬家人以後事人皆嘻笑之語畢竟瞑目而逝

湯克明字德昭諸生伉直有氣節議論常屈儕輩人或以為狂咸豐八年粵匪至張圩遇諸塗脅以荷擔叱曰我大清秀才為賊役耶賊改容謝之曰先生也盍為我掌文書事復瞑目叱曰劇賊族滅不久呼我以先生辱甚矣遂大罵被害事

聞贈世襲雲騎尉

陳棠字景南國學生家素封好義急公赴之惟恐不逮廣文屠蕪渚著麗水志稿携歸嘉興棠出百金購回鋟其板道光二十六年修志多資采擇他美舉亦俱類是子貢生鳳鏘以所建倉聖廟及禪山義塾助為圭山書院其尚義頗有父風云

案人物錄鳳鏘所助無俟論定故破例書之

呂加恩寶定莊人父疾篤醫者束手恩密至後園焚香默禱割乳旁肉作羹以進越日父甦恩秘不言後易衣妻詢血跡始知前之羹乃割肉所調也

徐文漪字泖莊歲貢生恬淡寡營終日執卷危坐凝

塵滿几泊如也咸豐十一年與子夢賢陷賊中漪將以計脫其子有以父子告賊者賊怒曰汝欲令爾子逃耶我今殺爾子奈何漪知不免拍案大罵與子同時被害事

聞贈世襲雲騎尉

何仍璣字珠峰小安人納貲得議叙布理問銜咸豐八年粵匪踞城團勇守禦北鄉倚以爲重數與賊戰斬馘百餘人議乘銳率勇攻城賊偵知先期合首部麋至勢不支與母翁氏同被害事

聞贈世襲雲騎尉

閻其新字春野麗水諸生好學工書善射性嚴毅嘗以忠義勉族人咸豐八年賊陷遂昌處州知府鄭箎召其新議守城策傾家募勇晝夜團防民倚爲重二月松陽陷賊逼府城其新督勇迎敵深入賊圍時賊已襲城城中火起其新見城陷突圍出率義兵守小安小安當金衢孔道紳士何仍璣招團固守其新與之合力賊屢來攻數戰殺賊千餘人擒賊目數十提督周天受軍至聲威益振旣大吏檄天受守桃花嶺官軍敗小安遂危其新猶日夜議復府城鄉人何某通賊賊諭其新仍璣孤立也

四月十九日遂盡起踞城之衆來攻仍璣陣亡其  
新退保上洛已而天受之師克復處州府其新有  
力焉其新以捐餉議叙巡撫羅遵殿奏請奉  
旨以知縣分發江蘇至十一年遂昌松陽復陷賊大股  
襲府城知府李希郊擊賊堰頭其新從之五月十  
五日戰敗與希郊同時陣亡其新弟增祿處州鎮  
標把總咸豐二年九月調赴江西防堵五年三月  
調赴安徽屢有功七年八月調防福建延平府徐  
墩街八年五月初十日遇賊戰死弟干總安邦把  
總安泰外委佩玉均於咸豐二年九月調赴江西

五年三月初六日在廣信府弋陽縣戰死閻氏兄  
弟先後死難事聞奉

旨賜卹均世襲雲騎尉

浙江忠義本傳

金國榮字獻廷精拳勇善使長矛由行伍擢金華把  
總粵匪犯金華奉檄回處乞援甫至而金不守知  
府李希郊留帶義勇營於松之堰頭賊至奮矛出  
擊戰正酣突見知府李被執躍而奪之躡於石賊  
刺以矛大叫曰吾不負李太尊也事

聞贈世襲雲騎尉

張紹照字叔藻諸生精堪輿素重聽咸豐八年遇賊

人呼之不應賊與語亦不解遂被害事

聞贈世襲雲騎尉

周國楷字學模諸生授徒於家足不出戶庭人罕見其面咸豐十一年在二都遇賊脅之入城不從以刃試其頸罵曰殺則殺耳我頸豈砥石耶遂被害事

聞贈世襲雲騎尉

林育萬字伯盈諸生工篆隸能詩著有紅豆詩稿咸豐十一年城陷倉卒不及避賊知爲秀才令書偽示執筆欲下忽歎曰我讀聖賢書乃爲賊作字耶

### 擲筆大罵賊殺之事

聞贈世襲雲騎尉

曹元愷字士林諸生家貧不妄取與舉動必以禮咸豐十一年賊至其村衆遁元愷獨端坐家中賊入謂之曰爾能使村民納款當免死愷厲聲叱之賊怒繫其手足撈掠至死罵不絕聲

張芳蕙字唐階諸生矩步繩趨以樸誠自矢避寇北鄉之庫川與子同陷賊賊殺其子蕙大罵賊又殺之

黃雲章字煥文諸生慷慨能任事咸豐十一年四月

郡城戒嚴知縣姚復輝飭督勇防桃花隘而別賊由遂昌下城陷章赴石帆與姚合力圖恢復同治元年遇賊金水執箠之墜崖幾斃猶罵不絕口

劉大榮南源人同治元年率子四人督鄉團至太平劫賊營斬獲無算別賊見火光來援遂不敵被殺子四人見父死亦大呼陷陣亡

齊兆熊諸生岑溪人粵匪至其村危坐中堂賊索錢米熊叱之備受箠楚拽以去絕食三日死  
武林配諸生武村人同治元年五月在張村街遇賊不屈被殺賊拋散其屍而去

葉敬寬葉榮邦均諸生高溪人團勇禦寇屢有戰功

一日大雨賊掩至邦被殺執敬寬命之降不從并遇害

徐應垣字春泰諸生下塢人素負氣精神強固讀書至老不衰咸豐十一年賊入其村垣責以大義賊曰腐儒也殺之

吳世忠諸生太平莊人咸豐十一年避亂於大鋪賊突至不屈被殺

趙芳武生精拳勇同治元年練鄉民百餘人在松坑口接仗連斃十數賊力竭被執賊勸之降誘以偽

秩芳大罵不從死

魏際參諸生博學多能精岐黃粵匪竄擾參年六十餘率其弟時榮子修廣修庚族人庭璜庭珪庭昌庭箴庭藜師夏等督鄉民防守賊入境奮力與戰敗退夜復大至卒不及防殺者甚衆參等均陣亡何志劭趙村諸生以忠義勉人團勇三百餘與賊戰連獲勝仗一日在鄭山擊賊賊佯敗十餘里追之伏發力戰亡

呂停雲監生世居寶定莊慷慨好施辛酉城再陷賊分股踞碧湖雲出貲團勇同治元年五月率所部

並各村團與賊戰於橫塘發銃擊渠魁中馬幾墜雲躍取級爲別賊掩擊斃事

聞准祀昭忠祠初雲之遇害也報至家其父協韶歎曰是兒素負氣今得死所矣同時戰死者呂兆春尤子春等二十七人購屍歸葬者厥師呂孔昭也

沈榮海由行伍擢溫州遊擊署撫標叅將久歷行間勇而能謀咸豐十年省垣被圍奉檄守鳳山門以計誘賊俘斬百餘人城陷奮大刀巷戰子武舉殿麟亦并力接仗賊蟻附至遂同時陣亡事

聞贈世襲雲騎尉

葉廷彪字增貴中營千總咸豐二年奉調赴省防堵旋調建平升授提標守備保舉都司九年在涇縣管林剿賊奮矛出戰殺騎馬賊目數人力竭陣亡事

聞贈世襲雲騎尉

馬錦鈴右營外委署把總咸豐三年奉調赴安徽防剿旋調祁門六年三月領兵在魯公橋接仗身先士卒陷陣衝鋒自辰至午賊來益衆圍之數重力戰死事

聞贈世襲雲騎尉

黃芝選都司銜右營千總咸豐二年與保升守備王文政吳金鰲儘先把總王得標陳飛熊效用范雙珠等奉調赴江西防堵三年五月粵匪圍省垣獨當一面屢戰屢勝圍解而處兵敢戰之聲大著五年奉調回浙行抵弋陽之龍鳳橋賊伏山後遣游騎詐爲村民誘之往擊選等負常勝之氣不暇料敵率兵三百人前進俄伏發賊數萬圍之遂力戰陣亡得脫者僅數十人事

聞均贈世襲雲騎尉

陳三餘誠樸有至性母歿結廬墓側晨夕不離家人

餉之必祭而後食值寇亂村鄰播遷餘獨守墓舍  
賊過感其孝饋以盤飧弗受服闋還家以足疾卒  
知縣吳爾慶旌其門

章理諸生訓蒙為業咸豐八年在蘇地衙遇賊賊給  
曰從我無憂不富貴理瞋目叱曰吾老矣何畏死  
遂被害事

聞贈世襲雲騎尉

褚蔚字華選諸生與弟邦達侍父避亂二都父一清  
亦諸生恒以義勗子及遇賊蔚死邦達亦死事

聞蔚贈世襲雲騎尉邦達准入昭忠祠

王麒福建試用巡檢以內艱歸同治元年在青田張

村遇賊死事

聞贈世襲雲騎尉

潭學塾職員樸訥戇直城陷死於寇事

聞贈世襲雲騎尉

王純字錫之童生城陷身被十餘創賊棄去之匍匐

投續衙基荷花塘死

吳世銀中營外委咸豐三年調赴安徽剿匪以功擢  
把總旋在泮路力戰中矛死銀勇敢明紀律所過  
無擾民德之其陣亡也為釀金收其屍以歸焉事



聞贈世襲雲騎尉

鮑建標字立初由行伍征曠夷以功擢專城把總咸豐十一年粵匪竄擾迭戰于龍宣諸邑屢獲勝仗後在北鄉下塢遇賊率村眾出擊眾見賊驚潰標獨奮矛衝突連斃數人身中十餘創死事

聞贈世襲雲騎尉

方朝龍字友生田行伍征曠夷擢把總咸豐三年調赴嘉興平望旋檄赴援江西累戰功至守備八年任廣豐擊賊勇敢寇三軍擢遊擊十一年檄回浙省巡撫王忠愍公諗其知兵軍事必與議他參遊

亦令詣龍商戰守策及糧盡城陷絕食已三日猶手劍斬數人而亾事

聞贈世襲雲騎尉

戊午辛酉之變殉難者難悉數計其由采訪錄報會奉部議入祀忠義均得附書而行事不概見謹連類次其名焉

- |     |     |     |     |     |
|-----|-----|-----|-----|-----|
| 袁廷隆 | 林得標 | 李生萱 | 吳慶榮 | 吳國富 |
| 吳廷璠 | 朱奎  | 朱德芳 | 翁國楨 | 張聖  |
| 潘元材 | 翁廷焯 | 翁國彬 | 李生鑑 | 李生聰 |
| 李運松 | 翁國棠 | 李億  | 李成信 | 楊利賓 |

王建鰲	吳得彩	王朝標	胡正元	胡國榮
闕君錫	伊國亮	譚經魁	汪有土	黃廷喜
熊得明	陳和水	詹朝標	何錦新	金玉英
徐得亮	謝廷鏞	張國彪	唐金彩	陳廷標
徐木土	應國榮	陳廷喜	王文冠	潘得福
周根有	陳滿富	劉培槐	王起亮	鄭朝榮
陳起高	王圭璋	翁國雄	翁廷琛	朱甘霖
朱進寶	朱成勳	朱孔階	李金水	李生棣
李運龍	朱吉棟	翁仁和	朱其旺	李師川
朱進有	朱宗富	李生豹	朱德雲	李生強

李五美	朱炳升	李運通	王春致	徐保和
項老九	方德璠	呂朝春	尤仁才	劉廷貴
金兒	江元方	王老四	王畚客	王三端
方新饒	尤漢培	徐大有	徐利宗	徐有根
徐夏根	徐章順	尤升旺	尤升顧	沈瑞培
藍湯福	戴木有	戴土有	詹金根	潘謀富
吳根和	何肇謙	葉金瑞	葉藍文	葉興萬
黃永華	黃老克	黃仁朝	黃寬賢	藍天有
李叶亮	李老奶	李藍寶	錢金選	梅根亮
陳銀賢	陳金培	陳培賓	徐中	王茂芝

高藍開	呂玉田	魏昌瑞	雷藍有	江新饒
劉金才	俞光雲	許雷養	雷藍孫	王良明
許蘭成	陳國照	梁細亮	尤有成	吳家楨
許國浩	郎唐兒	方湯成	尤步榮	徐國忠
王禮明	傅他俊	朱馬連	雷石功	王禮開
藍雷富	葉升萬	繆細兒	雷石孫	蘇瑞官
僧悟蘭	劉老克	藍勾	許仁信	藍進元
藍官明	闕能志	闕富光	藍宗順	藍春芝
雷才生	藍永富	何寬恩	王松培	曾庭歡
何桂芳	紀履謙	徐大海	王方太	藍永貞

雷金寶	詹金根	吳福喜	劉承孝	俞文清
傅增壽	叩大魁	叩海順	吳水媯	張林有
吳茂順	吳茂松	張丙和	周和松	藍顯寶
林火亮	顏有田	葉焯漢	葉國棟	葉祖木
葉起運	毛顯祖	黃士興	葉沛榮	姜梅載
紀唐樑	魏庭蕃	武權之	劉元彩	劉志權
劉永富	劉亨江	劉田運	劉森成	劉永萬
劉志豪	劉亨貴	劉亨富	劉亨德	劉永貴
劉永祖	劉前富	劉志進	劉永高	劉永盛
郭舜臣	吳守鈺	馮火有	曾葵松	甘水宗

甘細晚兒 閻增喜 閻芝光 閻芝永 齊金祚

尤子春

何雲煒字映丹歲貢生恂悞無華質魯而好學至老  
猶能背誦五經著有集經句避難文數篇為時傳

誦

魏庭亮字惟時沉靜好學為文根抵盤深每試優等

道光己酉拔貢 朝考取而復屏人為惋惜亮豁

如也知縣陶鴻勳薦舉孝廉方正不就教授里中

雀鼠之爭咸為解釋人亦得其一言以為重著有

遭難錄二卷

